

Yn Nah Cheim

Çhyndaays jeh skeeal scruit 'sy Vaarle ec John Pilling

Gyn scansh da preays y hymney veih'n Anneyder, ren mee tannaghtyn rish shallid dy yeeaghyn cheayrt elley er y phlanaid, as yn reayrt jeh lhieeney yn chooid smoo jeh'n uinnag. Va ny co-earrooderyn stiuree cummal seose shin ayns cruinlagh ard corrym mysh hoght cheead kilomeadar mooie, as veih'n oddid shen s'baghtal va ny gloutyn thalloon as ny faarkaghyn ry akin. Fo soilshey ny greiney, va ny daaghyn bunnidagh gorrym, argidoil, bane, cur yindys orrym.

As mish my hassoo ayns shen, va cooinaghtyn aym er y cheayrt s'jerree ren mee jeeaghyn er planaid ushlagh. Cha row eh gollrish yn er shoh, er chor erbee. Y planaid haink mee veih, she cruinnag voght vhillit ee lesh nieu ayns ny faarkaghyn as goul-roorid er y thalloon. Spooillit as jeant lhome, derrey nagh voddagh y speyr cummal seose bioys ny sodjey. Va cooinaghtyn trimshagh greimmey mee, derrey va mee currit er moostey liorish cronane gyere veih'n insheyder aym.

"Rob, vel oo fo raad foast?"

"Fo raad," dreggyr mish. Hyndaa mee veih'n uinnag as ren mee siyraghey lesh ny corridoryn staillin derrey raink mee e hamyr. Ren yn dorrays skirrey ry lhiattee tra yeeagh mee my chowrey enney as ren eh dooney dy kiune my lurg. Va'n Anneyder jeeaghyn er scape va soilshaghey magh reayrt y phlanaid choud's v'eh çhyndaa mygeayrt foin.

"V'eh bunnys jarroodit aym cre cho aalin foddee ad y ve," as eshyn dy kiune. Ren eh croymmey er oaie as hyndaa eh y scape hym.

"Ta'n feanish jerrinagh ain, Rob. Ta bioys ayn, agh ayns aght feer vunnidagh, myr bacteeryn. Lurg dooin scrutaghey ny sambil veih ny tharraryn ain, t'eh shickyry nagh vel veg noidagh dy yannoo jeeill da cummaghyn bea syrjey. Ta trimmid çheusthie jeh corrilagh beg jeh'n towse share. Eer lhiurid ny bleeaney as ny imbaghyn, t'ad jeh'n torçh veagh sleih oayllagh rish. Slane fondagh ta'n planaid shoh. Cha nel leshtal erbee faagit ain."

"Cre choud's ta er-mayrn ain?"

"Ta mee er hirrey tooilley fys dy eeraghey eirytyssyn yn daa phrowalys. Nee shen cur caa dou dy chumrail tuarastyl y yannoo rish kuse dy ooryn, ny rish laa ec y chooid smoo. Lurg shen, nee'n co-earrooder mainshtyragh, vees shickyry noi failleil, cooilleeney yn obbyr. Cho Leah's ta ny eirytyssyn soilshaghey magh dy vel ad coardail rish ny stundayrtyn femoil, nee eh goaill toshiaght er doostey reesht dy seyr-obbragh."

"Vel aght dy chur stap er?"

"Cha nel. Cho Leah's ta toshiaght currit er y starr, cha nel aght dy groll noi echey."

"Laa ny ghaa, shen ooilley ta shin feme dy arraghey veih ny feallee ain. Ta dy chooilley red reaghit, va'n cullee goll er scrutaghey as scrutaghey reesht rish bleeantyn. Ta fys ec dy chooilley pheigh er y churrym echey rere ny plannyn toshee ain. Cur sarey as nee ny spaalyn

toshee faagail ny sloo na oor woish nish. Fod mayd troggal laaragh bunneydagh as cur er shen y ve gobbraghey three laghyn woish nish."

"Rob, my vees shin jannoo veg agh faagail, ayns laa ny ghaa bee adsyn dooisht reesht, aght erbee. Veagh ad feddyn magh dy Leah ny va jeant ain. Cha jinnagh ad goaill fea derrey va drogh-chooilleeney jeant oc."

"Cre oddagh ad jannoo? Bee ooilley ny spaalyn ain, ooilley ny baatyn sauailagh. Veagh ad faagit er y lhong."

"Cha s'ayms cre oddagh ad jannoo, agh ny jarrood yn ablid oc dy lhiasaghey as dy ghientyn ass-y-noa."

"Ta'n planaid shoh bunnys cummit er-nyn-son hene," as mish. "Shoh yn caa ain. Nee ny feallee ain goaill kiarail jeh, cha jean ad spooilley eh. Cha bee ny marranyn cheddin jeant aynyn. Ayns shoh fod mayd gynsaghey as lhiasaghey 'syn aght ain hene, rere nyn reihyn hene. Nee mayd seihll y hroggal seose er undin dy chairys as dy hee, nagh vel mhillit liorish cooinaghtyn y chynney as ny foillyn jeh fer erbee elley."

Ren mee scuirr veih rish tammylt beg, as yn preays jeh ny va mee laccal soilshaghey magh bunnys goaill yn mainshtyragh orrym.

"Anneyder, cha by chiart eh yn caa shoh y choayl."

"Ta fys aym er shen, Rob," as eshyn. "Ta mee ayns coardailys rhyt, as shen yn oyr ta mee credjal dy vel eh orrin jannoo shickyr nagh jean ad doostey reesht. Faagail daue y caa sloo, fy yerrey hoal yinnagh shen cur y drogh orrin. Dy ve shickyr dy jean mayd tannaghtyn seyr, dy bee mayd foast ayn 'sy traa ry heet, ta feme orroosyn geddyn baase."

"Agh cre'n aght? Cho Leah's ta'n co-earrooder mainshtyragh er ngoaill toshiaght . . ."

"Foddee dy vel un aght ayn," as eshyn. "Ta mee er ve jannoo studeyrays jeh jallooyn gorrym ny lhuingey. Va dell laue dy reill noi yn choarys er lout reayrtey 'sy stoyr lughtee hene. Va ny çhagnysseyryn jannoo ymyd jeh tra v'ad shirveishagh er ny killagyn rioeeagh. Cha nel mee er ngeddyn veg dy insh dou dy row eh goit magh ass reesht as jeant myr ayn jeh'n cho-earrooder mainshtyragh. Foddee lesh yn aggle as yn driss dy scapail, v'eh jarroodit."

"Dell laue dy reill noi'n choarys? Myr shoh, fod mayd cur stap er y doostey reesht."

"My vees eh foast gobbraghey."

"Shegin dooin cur eab er, eisht, choud's ta traa giare foast er-mayrn ain."

"Ta cooish scanshoil elley ayn. T'adsyn ny fir s'jerree jeh'n dooghys oc. Veagh y currym orrin, dy jinnagh slane dooghys geddyn baase."

Yeeagh mee ersyn harrish y desk, as ren mee meihaghey y chooish, smoo myr v'ee er jeet dy ve nish.

"Ta mish arryltagh dy ghoail orryms y currym," dooyrt mee fy yerrey hoal. "Va caa mie ocsyn, agh ren ad mhillay eh. Cha jeanym livrey ny cretooryn shen dy gholl magh 'sy diunid reesht."

Ren yn Anneyder snoggal e chione dy moal.

"Myr shoh, shen myr bee eh," as eshyn.

Yn troggyder gys y stoyr lughtee, ren shen fosley dy jeeragh er y lout reayrtey. Choud's ren mee goaill kesmad er oaie, honnick mee y kishtey jiarg er y voalley er y çheu hoshtal. Er-eskyn va cowrey faase, "Shirveish Ynrican". Lesh padjer hostagh, doshil mee y farkyl as ren mee gleashaghey y dell shenn-emshiragh gys MOOGHIT.

Hie mee gys radling y lout as yeeagh mee magh harrish ny va jeeaghyn dy ve straneyn gyn jerrey dy chillagyn, as ayns cagh va corp ro-chadley. Ren ny soilshaghyn taishbyney er dagh killag lhiggey magh lonraghey geayney ren lhieeny y stoyr lughtee. Hoshiaght v'eh jeeaghyn nagh row veg taghyrt. Eisht, beggan er veggan, ghow soilshey ny ghaa toshiaght er caghlaa veih geayney gys jiarg, roish daue meekey as çheet dy ve mooghit. Fer ny ghaa ec y toshiaght, as eisht cheeadyn jeu ooilley cooidjagh, derrey va'n clane stoyr lughtee dorragey.

Choud's va mee jeeaghyn er ny fir dooinnoil s'jerree geddyn baase, loayr mee er ard,

"Cha nel mee goaill arrys erbee. Va shiuish jannoo seose danjeyr ro vooar. Myr va shiu er dy rieu."

Gyn jeeaghyn my chooyl, daag mee dy gholl marish ny feallee aympene dy hroggal yn chield theihll robot ain.